



*Resolución da Xefatura Territorial da Consellería do Mar na Coruña pola que se publica a lista provisional de puntuacións das embarcacións admitidas ao proceso de elaboración da lista aberta para o incremento do número de cotas de captura para as embarcacións incluídas no plan de xestión do recurso específico PERCEBE, modalidade a pé e dende embarcación, da Confraría de Pescadores de Laxe e as embarcacións excluídas.*

### Antecedentes

1. A Orde do 22 de decembro de 2021 aprobou os plans de xestión para recursos específicos e algas en Galicia para o trienio 2022-2024. (DOG Núm. 251, de 31.12.2021).

De conformidade co expediente de aprobación do plan de xestión para o recurso específico percebe (PE410A 2021/30-1), modalidade a pé e dende embarcación, da confraría de pescadores de Laxe (en diante a entidade) estableceuse un número máximo de 18 embarcacións con 42 tripulantes habilitados con dereito a cota.

Trala finalización do último proceso de renovación de 2021 desta modalidade na entidade para o trienio 2022-2024, o número de embarcacións con percebe no permiso de explotación autorizadas para participar no plan é de 16 embarcacións e 31 habilitacións.

2. O 08.11.2022 (Registro de Entrada N° 2022/2743195) a entidade presentou unha solicitude para que se iniciase o proceso para incorporar novos participantes ó plan de xestión ata completar o número máximo de participantes.

3. O 21.11.2022 esta xefatura territorial comunicou unha proposta á entidade para proceder á convocatoria dun proceso selectivo para o outorgamento de 2 permisos de percebe a pé por se existise interese nesta modalidade na entidade de acordo co aprobado no Plan de xestión, así como a convocatoria dun proceso selectivo para o outorgamento da modalidade de percebe a 2 embarcacións con 2 cotas para cada unha delas (4 cotas en total) para logo iniciar o proceso de elaboración de lista aberta para o incremento de cotas de captura para as embarcacións participantes no plan coa finalidade de ofertar posteriormente as cotas restantes ata acadar o número máximo aprobado no plan. Nesta comunicación outorgábaselles un prazo de tres (3) días hábiles para que presentasen as observacións que considerasen oportunas e que de non recibir resposta no prazo sinalado entenderíase como positiva a proposta realizada por esta xefatura territorial.

4. O 22.11.2022, a entidade contestou xuntando a proposta da Agrupación de percebeiros, na que indican que actualmente non existe demanda de permisos de explotación a pé e si para a obtención da modalidade a flote, polo que abren a posibilidade de trasladar as vacantes dos permisos a pé aprobados no plan á modalidade a flote e de non poder facerse efectivo que se inicie o proceso selectivo para a modalidade a flote previsto no





plan.

5. O 30.11.2022 esta xefatura territorial ditou a resolución pola que se convocou o proceso selectivo para o outorgamento da modalidade de percebe para dúas (2) embarcacións e catro (4) cotas para percebeiros/as, para o exercicio da actividade extractiva no ámbito do plan de xestión de percebe da confraría de pescadores de Laxe.

6. O 31.01.2023, esta xefatura territorial ditou resolución aprobando a lista definitiva das embarcacións seleccionadas no proceso selectivo indicado no punto anterior. A modalidade do recurso específico PERCEBE asignouse ás dúas embarcacións seleccionadas, polo que na actualidade o número de embarcacións con percebe no permiso de explotación autorizadas para participar no plan é de 18 embarcacións e 35 habilitacións.

7. A Resolución do 24.02.2023 desta xefatura territorial abriu o prazo de presentación solicitudes para a elaboración da lista aberta para o incremento do número de cotas de captura para as embarcacións incluídas no plan de xestión do recurso específico PERCEBE, modalidade a pé e dende embarcación, da confraría de pescadores de Laxe.

#### *Consideracións legais e técnicas*

1. A Orde do 30 de decembro de 2015 pola que se regula a explotación dos recursos específicos no ámbito da Comunidade Autónoma de Galicia, establece nos artigos 39 a 46 o procedemento para o incremento do número de cotas de captura para as embarcacións incluídas nun plan de xestión. No seu artigo 39 establece un sistema de lista aberta para o incremento do número de cotas de captura para as embarcacións incluídas nun plan de xestión na que a orde de prelación das embarcacións virá determinado pola puntuación obtida trala aplicación do baremo previsto no artigo 43.1.

2. As solicitudes presentadas valoráronse de acordo co baremo aprobado pola Resolución do 4 de maio de 2016, da Dirección Xeral de Desenvolvemento Pesqueiro, pola que se aproba o baremo para acceder ás modalidades de recursos específicos no permiso de explotación das embarcacións, así como para elaborar as listas e actualizar os méritos para o incremento do número de cotas de captura para as embarcacións incluídas nun plan de xestión de recursos específicos, modificada pola Resolución do 18 de maio de 2020, da Dirección Xeral de Desenvolvemento Pesqueiro.

3. As embarcacións admitidas están incluídas no plan de xestión do recurso específico PERCEBE, modalidade a pé e dende embarcación, da confraría de pescadores de Laxe e cumpren os requisitos establecidos para participar no sistema de listas para o incremento do número de cotas de captura do recurso específico percebe (artigos 41 e 42 da Orde do 30 de decembro de 2015).

4. Esta xefatura territorial é o órgano competente para a elaboración e o control das listas, así como para a súa actualización e para comunicar o seu emprego de conformidade co establecido na sección 4ª do capítulo III e o artigo 52 da Orde do 30 de decembro de 2015, pola que se regula a explotación dos recursos específicos no ámbito da Comunidade Autónoma de Galicia.

De acordo con todo o anterior, esta xefatura territorial

RESOLVE:





1. Facer pública a lista provisional das puntuacións obtidas por cada unha das embarcacións admitidas para a elaboración da lista aberta para o incremento do número de cotas de captura para as embarcacións incluídas no plan de xestión para o recurso específico percebe (PE410A 2021/30-1), modalidade a pé e dende embarcación, da confraría de pescadores de Laxe (anexo I).

Contra a relación provisional de puntuacións acadadas as persoas interesadas poderán presentar alegacións no prazo de 15 días hábiles, contados a partir do seguinte ao da publicación desta resolución ante a Xefatura Territorial da Coruña da Consellería do Mar. As alegacións non se contestarán expresamente de xeito individualizado, aínda que, de selo caso, si se terán en conta para a puntuación definitiva.

2. Facer pública a lista definitiva das embarcacións excluídas, así como as causas da súa exclusión (anexo II).

As embarcacións e persoas excluídas poderán presentar contra esta resolución, que non pon fin á vía administrativa, un recurso de alzada ante a Conselleira do Mar no prazo dun (1) mes contado a partir do día seguinte ao da publicación desta resolución, de acordo co establecido nos artigos 30, 121 e 122 da Lei 39/2015 de 1 de outubro, do Procedemento Administrativo Común das Administracións Públicas.

A presente resolución publicarase no taboleiro de anuncios da Xefatura Territorial da Coruña e na páxina web <http://mar.xunta.gal/>. A resolución tamén se exporá, con carácter informativo, no taboleiro de anuncios da confraría de pescadores de Laxe.

O artigo 10 da Lei 4/2019, do 17 de xullo, de administración dixital de Galicia, establece a obrigatoriedade para as persoas traballadoras autónomas de relacionarse a través de medios electrónicos no ámbito do sector público autonómico para os trámites e as actuacións que realicen no exercicio da súa actividade profesional. Por tanto, a documentación indicada, deberá presentarse por vía electrónica:

- Para alegacións a través do formulario normalizado asociado á solicitude inicial do procedemento PE401M (achega de documentación separada da solicitude) ou ben a través do formulario de alegacións dispoñible nos modelos xenéricos da sede electrónica.
- Para un recurso de alzada mediante o formulario xenérico tamén a disposición na sede electrónica da Xunta de Galicia (<https://sede.xunta.gal/>).

Para a dita presentación será necesario identificarse electronicamente mediante calquera dos sistemas de identificación e sinatura admitidos pola sede da Xunta de Galicia

Esta resolución notifícaselle a confraría de pescadores de Laxe coma entidade participante do plan de xestión do recurso específico percebe, consonte ao artigo 40 e seguintes da Lei 39/2015, de 1 de outubro.

A xefa territorial  
María José Cancelo Baquero  
(sinatura electrónica)





## ANEXO I

**CONFRARÍA DE PESCADORES DE LAXE. RELACIÓN PROVISIONAL DE PUNTUACIÓNS DAS EMBARCACIÓNS ADMITIDAS NO PROCEDIMENTO PARA A ELABORACIÓN DA LISTA ABERTA PARA O INCREMENTO DE COTAS DE CAPTURA PARA AS EMBARCACIÓNS INCLUÍDAS NO PLAN DE XESTIÓN DO RECURSO ESPECÍFICO PERCEBE (ordenadas por orde de puntuación).**

Embarcación	Matricula	Folio	Embarcación cunha soa cota de captura C.1	Experiencia profesional persoa armadora C.2	Habitualidade da actividade pesqueira C.3	Total
ALBERTO SEGUNDO	CO-3	1-09	5,00	2,60	3,00	10,60
JORGE	CO-3	1575	5,00	2,20	3,00	10,20
ISAAC	CO-3	1600	5,00	4,00	1,00	10,00
O SALMONETE	CO-3	2-11	5,00	4,00	1,00	10,00
TOJA	CO-3	1-07	5,00	3,20	1,00	9,20
LAXEIRA	CO-3	2-04	0,00	4,00	3,00	7,00
RIA DE LAXE	CO-3	4-92	0,00	4,00	3,00	7,00
SEGUNDA ORLINDA	CO-3	1-92	0,00	4,00	3,00	7,00
BARCIA	CO-3	2-20	0,00	4,00	2,00	6,00
AVE S	CO-3	3-20	0,00	4,00	1,00	5,00
SEGUNDO RUSIÑO	CO-4	1873	0,00	2,20	2,00	4,20
NUEVO MODES	CO-3	1-06	0,00	4,00	0,00	4,00
MARIPOSA	CO-2	3839	0,00	0,60	1,00	1,60
CINTIA T	CO-3	3-00	0,00	0,00	1,00	1,00
PLAYA DE ESTORDE	CO-5	2-93	0,00	0,00	1,00	1,00
AUXILIAR DEL PAZ	VILL- 5	52	0,00	0,00	0,00	0,00
NOVA SANTA ROSA	CO-2	1-21	0,00	0,00	0,00	0,00





Os epígrafes de cada columna son: (de acordo co apartado C do anexo I da Resolución do 4 de maio de 2016, da Dirección Xeral de Desenvolvemento Pesqueiro, pola que se aproba o baremo para acceder ás modalidades de recursos específicos no permiso de explotación das embarcacións, así como para elaborar as listas e actualizar os méritos para o incremento do número de cotas de captura para as embarcacións incluídas nun plan de xestión de recursos específicos, modificada pola Resolución do 18 de maio de 2020, da Dirección Xeral de Desenvolvemento Pesqueiro)

**TOTAL:** puntos acadados en total.

• **C.1: Embarcacións que só teñen unha cota de captura no plan de xestión: 5 puntos.**

• **C.2: Experiencia profesional no sector da persoa armadora da embarcación**

Terase en conta que a persoa armadora estivese enrolada como mergulladora en embarcacións que contan coa modalidade nos 2 anos anteriores á data da convocatoria: 0,2 puntos/mes completo. Non se puntuarán os méritos de formación e experiencia profesional cando a persoa ou algunha das persoas seleccionadas sexan armadoras ou propietarias doutras embarcacións que xa posúan as modalidades de marisqueo de vara ou de recursos específicos no seu permiso de explotación. **A puntuación máxima total que se poderá obter nesta epígrafe será de 4 puntos.**

• **C.3: Habitualidade da actividade pesqueira**

- Se a embarcación acredita ter realizado actividade extractiva entre 15-35 % dos días que foron efectivamente autorizados para a extracción dentro do plan de xestión do ano natural inmediatamente anterior: 1 punto.

- Se a embarcación acredita ter realizado actividade extractiva entre 35,01-60 % dos días que foron efectivamente autorizados para a extracción dentro do plan de xestión do ano natural inmediatamente anterior: 2 puntos.

- Se a embarcación acredita ter realizado actividade extractiva superior a un 60,01 % dos días que foron efectivamente autorizados para a extracción dentro do plan de xestión do ano natural inmediatamente anterior: 3 puntos,

**A puntuación máxima total que se poderá obter nesta epígrafe será de 3 puntos.**

## ANEXO II

### CONFRARÍA DE PESCADORES DE LAXE RELACIÓN DEFINITIVA DAS EMBARCACIÓNS EXCLUÍDAS DO PROCEDIMENTO

Non hai embarcacións excluídas do procedemento

